

Öise Lade 11-2014, p. 62

In salid *rumantsch*

Il zercladur hai jau festivà mes 25avel anniversari. Igl era ina sonda e fin mezdi aveva jau anc scola. Jau sun m'allegrada sin la saira. Jau n'aveva envidà nagin, ma in u l'auter aveva gia ditg ch'el vegnia speravia per far in viva e mangiar in toc turta.

Curiusamain n'aveva tuttenina nagin temp. Quels che avevan gia ditg



... ed jau
na saveva
da nagut

ch'els vegnian, avevan da tuttas stgissas e quels che ma gratulavan per SMS vegnivan era pli quiets, cura che jau als dumandava, sch'els hajan peda per in toc turta.

Suenter scola sun jau anc restada in mument a Cuira per ir a gentar cun mia madritscha. Cura che nus essan alura ids a chasa si Trun aveva mia famiglia fatg ina lavuruna. Mes geniturs, mia sora e mias cusrinas avevan rumì e decorà la garascha, fatg desserts e buccadinas. Jau aveva tut nau-scha conscienza, cunquai che jau saveva che nagin n'aveva temp da vegnir.

Ma, tge surpraisa! Vers las set in suenter l'auter che vegniva dad isch en. Mes ami aveva envidà tuts e fatg giu cun els da nagut a mai. La garascha era plaina ed jau era baud qua e baud là per dar ina baterlada. Per fortuna hai dà questas buccadinas che jau hai uschè gugent: apricosas e primblas tostas enzugliadas en charnpiertg. Per seser giu e mangiar in toc turta n'hai jau betg gì peda. Ma, per metter spert in'apricosa en bucca hai jau adina chattà in bun mument.

Marina Wyss

Marina Wyss